

անասնապահութեան, որը ժողովրդի գլխաւոր պարապմունքն է: Ամենաջերմ ամառները միայն կարող են հալել մշտական ձիւնը սարերի գագաթից. օդը տոգորուած է կազդուրիչ խոնաւութեամբ, եւ ձորերի միջով վազող վտակները եւ աղբիւրները երբեք չեն ցամաքում:

Յաղբակայ սարերի վրայ եւ ձորերի մէջ ցրոած են հայոց բազմաթիւ գիւղեր, որոնք ներկայացնում են մարդու կեցութեան խորին-նախնական դրութիւնը: Գետնափոր տները՝ զանազան ոլորմուր ուղղութեամբ՝ տարուած են հողի տակով եւ ձեւացնում են կատարեալ լաբիրինթոս. նրանց մէջ իրանց անասունների հետ բնակւում են մարդիկ պարզ, խաղաղական կեանքով: Ամենափորձեալ աչքն անգամ չէ կարող որոշել գետնափոր խրճիթները հողի տափարակ մակերեսոյթից, միայն վաղորդեան ծուխը, երթիկների ծակերից դուրս հոսող ծուխը յիշեցնում է՝ թէ այն ստորերկրեայ խորշերի մէջ ապրում են մարդիկ...

Գարնան սկզբից բնակիչները իրանց հոտերի հետ գաղթում են դէպի հեռաւոր սարերի արօտները, այնտեղ ապրում են վրանների տակ մինչեւ աշնան վերջը: Գիւղերը համարեա թէ դատարակւում են տղամարդերից, գերդաստանի ծերունիքը միայն մնում են հսկելու տներին, որ ազատ պահեն նրանց չար ձեռքերի հրդեհելուց:

Բացի հայերից, Յաղբակայ սարերի վրայ թափառում են քրդերի զանազան խաշնարած ցեղեր, որոնք չունեն հաստատ բնակութիւն, այլ տարուայ տաք ամիսները անցուցանում են բաց օդի տակ, իսկ ձմեռը գետեղում են հայերի գիւղերում, եւ ամէն մի հայ ընտանիք պարտաւորուած է պահել մի քանի քուրդ գերդաստան նրանց անասունների հետ: Ծանրութիւնը եւ նեղութիւնը, որ կրում են հայերը այդ ինքնակոչ հիւրերից, հասնում է վերին աստիճանի անախոժութեան: Թողնենք այն, որ տանտիրոջ կացարանն իր համար եւս նեղ եւ անբաւական է, ուր մնաց որ նա աւելորդ մարդիկ ընդունէր իւր խրճիթի մէջ: Բայց անտանելին այն է, որ շատ անգամ ձմեռը տեւում է աւելի երկար քան թէ սովորականը, քուրդը սպառնում է իր պաշարը, այն ժամանակ հիւրընկալը պարտաւոր է ինամել նորան եւ նրա անասուններին, մինչեւ սարերից ձիւնը բարձրանայ, խոտերը բուսնեն, եւ նա կարողանայ այնուհետեւ ապրել աստուծոյ սեղանից: Տանուտիրոջ մի փոքր ընդդիմադրութիւնը կարող է նրա կեանքը վտանգի մէջ գցել հիւրի կողմից, որի զենքերը մարմնի անբաժան մասն են կազմում, եւ նրանց իր կրքերին համաձայն գործածելը՝ չէ արգելում ոչ մի օրէնք եւ ոչ մի իրաւունք:

Այս կիսավայրենի ազգը, որ կառավարւում է իր բեկերով եւ շէխերով, պահպանել է բոլոր բարբարոսական յատկութիւնները մի ժողովրդի, որ չէ